

Թեան գրոյս, զի շատ արտասուելով և հառաչանօք գրեցի զայս. զի այսմ ժամանակի փախստական էինք ի հայրենի տեղեաց Երզրովցայու ի Շէջովն քաղաք, ի ձեռաց չար Խմէլին. զի շատ աւերում արար ի Լեհաց երկիրն: Յայսմ ժամանակի եկաւ Տէր մահտէսի Գասպարն Երուսաղեմայ, զի ուխտն կատարեալ էր. եկաւ ի Շէջով քաղաք. յետոյ չկարաց երթալ ի Երզրովցա, զի շատ խառնակութիւն էր. ամէն հարամի եղիր էր. որ իսկի չէին թողեր որ մարդ գալէր ճամբահներն. զի այս չարութեանս է պատճառ Խմէլին. յետոյ ետուր իւրեան հալալ ընչիցն՝ ինձ անարժան մեղաւոր Մուրատ սարկաւագիս, որ զայս սակաւ կանոնահրամանն գրեցի. այլ բաւ է: Աղաչեմ զձեզ ով հայրք և եղբայրք, հայրսպետք և վարդապետք, քահանայք և սարկաւագք, յորժամ կարդաք կանոնահրամանս կամ օրինակէք, յիշեցէք զանարժան ծառայն ձեր Մուրատ սարկաւագ զգծող սորին, և զնձողան իմ, զխոճայ Միքայէլն՝ որ առ Աստուած փոխեցաւ, և զմայրն իմ Երզութ խաթունն. յիշեցէք միով Հայրմերիւ, և Աստուած զձեզ յիշէ միւսանգամ գալստեանն. ամէն: — Ո՛հ գիր՝ որ մնաս. ո՛հ ձեռք որ հողանաս. ո՛հ եղբայր որ թէ զմեզ չմուսնաս: [Կանոնագիրք. ի Ս. Ղազար]:

1652.

Ի Թուականիս մերում ՌՃ (1651-2) ամին ելեալ ի Ս. Էջմիածնայ՝ բարձրափառ և ամենահոշակ Տէր Փիլիպպոս կաթողիկոսն, հանդերձ 12 վարդապետօք, չողաւ յԵրուսաղէմ, առ որ և զամենաթշուառս (Յովհաննէս Վ.) կրսերս ի բեմբասացս և հուսկ վերջոտնեալս ի ծնունդս եկեղեցւայ, ունելով ընդ իւր. որոյ այս 25 ամ է զի ծառայեցի նմա մտերմաբար. և զնացեալ մինչև ի քաղաքն Էնկիւրեայ, և անտի յղեալ զմեզ ի Թիւզանդիոյ՝ սակս զնոսին հրաւիրելոյ ի Ս. Երուսաղէմ... Եւ արդ զնացեալ ի սուրբ քաղաքն Երուսաղէմ ընդ վերոյ գրեալ Տեառն մերոյ, և անտի եւս դարձաք ի յարքայական քաղաքն ի Կ. Պօլիս. և անդէն զմեզ ուղարկեաց Իլախաց աշխարհն՝ հայրն մեր, ինքն չոքաւ ի յաթոռ իւր ի Ս. Էջմիածին, նոյն միաբանօքն: Իսկ իմ երթեալ յայս վերոյասացեալ երկիրն, իբրեւ կատարեցաք զգործս մեր, յետ երկուց ամաց դարձաք ի Ս. Էջմիածին... [Աշտարակ ի Մոռ]:

1654.

Գրեցաւ Ատենագիրքս ի յաշխարհս Իլախաց ի քաղաքն Կամէնից, ի դառն և ի տրտում ժամանակիս, ի վշտալից և ի թշուառական ատենիս, և ի նեղաց սրտիս և ի այրեալ լերդիս, պիղծ և անօրէն Հոռոմ ազգէն, անուամբ կոչեցեալ չՊօլտան Խմէլէնիցքէն, որ երկու ամ պաշարեալ և զերեալ զաշխարհս Իլախաց, զքաղաքս, զգիւղս, զգաւառս, զգիւղաքաղաքս, զժամս, զժամատեղս, զքահանայս և զկարդացողս, զկենդանիս և զմեռեալս, զամենայն զինչ ի միտս անկանէր և ի ձեռն հասանէր, նա անխնայաբար և անողորմաբար տանջեալ զերեալ և տայր ի ձեռս այլազգեաց, որ կոչուէին Թա-